

Transkription von Urkunde RIG 1454a

Ort, Datierung: Riga, 1454-04-07

Signatur: , k.A.

Inhalt: Ertzbischoff Silvester: Güterübertragung

Wy Siluester von godes vnd des Romisschen stoles gnaden der Hilligen kerken to Rige Ertzbischoff
, don kund vnd openbar allen / de dessen vnsen breeff sehen horen effte lesen So alsdenne yn vortiden
vnsir kerken prouest deken vnd Capittel vor datt(um) desses breues / wedder vnse leuen getruwen
voged Borgermeistere Raed vnd(e) meynheit vnsir Stad Rige Im hoeffe [t]o Rome etczwelke gudere als
/ mit namen dat landt Titier teghen dolen vnd dem stenholme ouer der dune belegen vnd etczwelke
andere gudere buten efft / bynnen der Stad Rige wo de syn ym rechte affgewonnen hebben Also dat en
mit dren Ordeln so[ld]¹ gudere togespraken syn ge/wurden v(m)me meringe groter leue tusschen den
itczundigen Prouest deken vnd Capittel vnd den benomeden vogede Borger=/meistere Radmannen vnd
Menheit vnsir Stad Rige , hebben de ergedachten Prouest Dekan vn[d] Capittel yn vnse
Ertzbis=/schopps erbenomet Jegenwordicheit angesehen der Stad rechticheit mit vryem willen
ouerantworten alsulke gudere alle so vor/benomet stat de ze en deel yn weren hadden , den
vorberurden vogede Borgermeistern Radmannen vnd Menheit yngeantwortet / vnd yn krafft dess
breues ouerantworten , vorsakende ouergeuende vnd delghende alle vorberurde Ordell vnd process efft /
schriffte de vor datt(um) desses breues dar ouer Jm hoeffe to Rome beholden vnd gewonnen syn Ok de
breue de to kerckholm vor=/segelt syn mit erer ynholdinge gudere vnd ordell effte schriffte Alle dusse
vorgeschreuen artikel vnd puncte vnd eynen Isliken / besunder(e)n Wÿ Siluester Ertzbischoff vnd
Theodericus nagell prouest Johannes Treppe , deken vnd dat gantze Capittel / to Rige vorheten vnd
gelouen yn crafft dusses breeffes , dat wy efft vnse nakomelinge to ewigen daghen mit sodanen Ordeln /
vnd process effte breuen de vorgedachten voged Borgermeister Raed vnd Menheit ny(m)mer sollen
effte willen anlagen sunder / ze by sodanen gudern rowliken bliuen laten to ewigen tiden , Des to
merer Tuchsse hebbe wy Siluester der hilligen kerk(e)n / to Rige Ertzbischoff vnd Theodericus
nagell Prouest Johannes Treppe deken vnd dat gantze Capittel der hilligen kerken to / Rige
vorbenomet vnd wy vere van der manschoff dersuluigen hillig(e)n kerken alse her Jurigen pereuall vnd
her Jurig(e)n Ixail (?) Ritter(e) / Engelbrecht van Tisenhusen vnd Merten van vnger(e)n vnse Jngesegil
geheten hangen vnden an desen breeff , De gegeuen vnd / geschreuen is to Rige am Sondage Judica yn
der vasten Jm iare (cristi) dusent veirhundert veirvndviffich /

¹ oder: *solke*